

Nanci

dóu Proulogue: Moussu Magnan, vièi retreta.
Un passant.

de la pèço: Controfiéu — Cap dóu service de l'Etat-Civil.
Quaranto à quaranto-cinq an environ.
Ome lisquet mai paradaire, afeta, arlèri, esperit seme, tout en façado.

Gratadou — Pèr-aqui 55 ans. Vièi secretàri, zela, pountuau, mai falot,
crentous, maniacle e routinié.

Vacherie — Jouine paire de famiho.

NOTO DE L'AUTOUR

La rareta soulo d'un prenum estènt l'encauso primero d'aquelo pichoto coumèdi pau enchau, au founs, qu'aquéu prenum siegue Nanci vo tout autre. En sorto que se li refoulèri de la modo expandissien largamen, subran, lou pichot noum de Nanci (vo Nancy) li coumedian, en aquéu cas, aurién que de n'en chausi un autre reputa autant rare, retipant tant qu'es poussible à Nanci, (pèr eisèmples: Naneci, vo Nantci, vo Nonci, Nancia, Nanceia, Nancila etc), e à moudifica, naturalamen, lou teste en counsequènci.

PROULOGUE

Sian dins un vilage gardounen. Entre que li tres cop soun pica li lume s'amousson un moumenet dins la salo e sus la sceno. Quand la lus revèn un brave moussu, l'èr dun retreta, es asseta sus un banc bouta au mitan de la sceno, davans lou ridèu. L'ome es à mita escoundu pèr lou journau largamen desplega que legis. Un vilajan que passo per aqui regardo lou legissèire e de primo abord lou reconèis pas. Mai lou papet, que l'a entendu veni, baisso sa gazeto e li dous ome se reconèisson.